

元明事類鈔

欽定四庫全書

元明事類鈔卷三十五

監察御史姚之駟撰

果木門

梅

澆紅宴 元氏掖庭記宮中紅梅初發攜尊對酌名曰
澆紅之宴

燕地新移 輟畊錄初燕地未有梅花吳閒閒從江南

移至護以穹廬句曲外史訪之若與西湖故人遇徘徊既久不覺熟寢於中比覺閒閒命作詩以贖過送集賢諸君子和之

梅華傳 王冕梅花傳先生姓梅名華字魁不知何許人或謂出炎帝翩翩濁世之高士也觀其清標雅韻有古君子之風焉

鴛鴦梅 謝宗可鴛鴦梅詩枝頭交頸棲香煖花底同心結子肥金殿鎖烟妝粉額玉堂環水浴紅衣

疊葉梅 吳澄疊葉梅詩羅浮夢斷杳無踪冰雪仙姿
兩兩逢縞袂怯單寒後襲粉妝嫌薄晚來濃迎風一
笑知顏厚臨水相看見影重道眼只將平等視玉環
飛燕總天容

玉蝶梅 王逢詩藻池岸匝水仙開滿面飄香玉蝶梅
繡苔 元僧明本苔梅詩古貌蒼然鶴膝枝唾花生暈
護香肌李流芳詩村園數樹已生苔自注西山梅花
幹上皆生綠苔繡澁可愛此中無此種

只留清氣 復齋日記王元章善畫梅多自書所題於
上嘗題云我家洗研池頭樹箇箇花開淡墨痕不要
人誇好顏色只留清氣滿乾坤

梅杖 劉因梅杖詩天教一握歲春密風送餘香就手
吹詳見杖

脆梅 元劉詵詩紈扇晴嬉墮脆梅

蜜梅 顧瑛謝人惠蜜梅詩江南烟雨未全黃誰使青
酸墮蜜房

鄧尉香雪 袁宏道集鄧尉與元墓諸山相屬山中梅
最盛開時香雪三十里

河渚梅 西湖志永興寺有綠萼二樹古幹扶疎為河
渚西溪之冠

盆梅 夏言詩廿載長安不見梅一枝春向小盆開

梅認新年 王穉登詩此地人家無玉厯梅花開日是
新年明汪衢謝人送厯詩梅花枝上厯自識山中春
詩與梅約 沈周雪湖賞梅詩新詩似與梅相約詩到

成時梅恰香

精神氣節 西湖志餘馬浩瀾評梅詩和靖暗香疎影
一聯寫梅之風韻耳後高季廸雪滿山中高士卧月
明林下美人來狀梅之精神楊庶夫萬花敢向雪中
出一樹獨先天下春道梅之氣節

榔梅結實 獻徵錄永樂三年榔梅結實住持李幽岩
遣道士上貢次年復實亦如之賜齋甚厚花史太和
山有榔梅相傳真武折梅寄榔樹上云吾道若成開

花結果竟如其言

梅籃 瑯琊漫抄永嘉婦人以青梅雕刻脫桮鏤以花
鳥手擘之玲瓏如小盒闔之復為梅謂之梅籃

補梅構亭 西湖志至元中儒學提舉余謙于孤山補
植梅數百本構梅亭於其上

當首植 學圃餘疏紅梅最先發元日有開者此花故
當首植

蠟梅

檀心淺露 元馮子振蠟梅詩洗却鉛膏飾道裝檀心
淺露紫香囊

冷金 耶律楚材謝人惠蠟梅詩雪裡冰枝破冷金

檀香梅 羣芳譜蠟梅有開最先色深黃如紫檀者花
密香濃名檀香梅此品最佳

水仙作婢 瓶史蠟梅以水仙為婢

磬口 學圃餘疏蠟梅一種花雖盛開常半含名磬口
梅出河南次曰荷花出松江又次曰九英

狗蠅 本朝揆叙襍識蠟梅以經接者為佳子出者花
小而香淺名九英俗謔為狗蠅已見范石湖梅譜然
未言其子出也

杏

巴旦杏 羣芳譜巴旦杏一名八擔杏出回回地

植千餘株 春明夢餘錄元董宇定杏花園在上東門
外植杏千餘株至順辛未諸名士宴集于此皆有詩
虞集為之記周伯琦揭傒斯歐陽元功和其詩

退房時 元好問集看看海棠如有語杏花也到退房時自注予絕愛未開杏花故以為戲

千樹紅雲 元果囉羅東岳廟杏花詩上東門外杏花開千樹紅雲遶石臺最憶奎章虞閣老白頭騎馬看花來

二杏 范梈二杏詩北隣杏一株身作龍盤拏直上青天中虛空高結花南隣杏更好枝幹相交加三月二月時匝地堆紅霞

瓶杏着花 袁桷張節婦瓶中杏枝着花詩陶人妙合
陰陽機凍壺頃刻迴芳菲盈盈綠房綴冰蕊玉蝶姍
娜穿帷飛互見瓶

芙蓉杏 元方輿勝覽海雲寺有千葉杏二株名芙蓉
杏錢唐張叔夏見之稱其奇麗江南所無為填三姝
媚詞

杏精 宋濂集危素未仕時館貴溪張氏張思伐杏樹
以闢家塾有鬼夜告公曰吾杏之精也主人將伐願

參政生之公即造張力解而止鬼致白金壺為謝

文杏館 屠隆小輞川記池西有榭臨澗澗前植杏樹
數十株顏曰文杏館

杏花谷 王衡遊香山記卧佛寺面面皆杏花而一緋
杏據西園上者大可迎抱且殊麗吾鄉朱氏園三十
本較此直春薺耳豈知天壤間自有杏花谷哉

得杏三枝 夢珍廣記王鈺夢騎黑龍于土上橫一金
玉砌橋跨而折杏三枝解之者曰黑龍應壬辰科金

玉砌橋乃汝姓名得杏三枝乃探花也後永樂七年
果中第三

杏柯水 宋濂遊荆塗二山記廟前杏樹一章大可蔽
牛中置小甕杏柯之水時津津滴其內

杏塢 袁凱杏塢詩窈窕石徑深參差繁英滿發采已
云奇生香殊未斷

破挾作藥 吳寬杏詩莫言結寔供人啖破挾還看作
藥材

桃

愛嬌宴 元氏掖庭記宮中碧桃盛開舉杯相賞名愛
嬌之宴

桃羞 馬臻詩地瘦仍慳雨桃羞未着花

白淡紅薦 元張宏範碧桃花詩應是元都觀裡仙為
嫌白澹厭紅薦

啗一桃 邱長春本行碑真人赴京師上遣中使賜上
林桃師不食菜果者十餘年矣至是取其一啖之重

上賜也

日月桃 羣芳譜桃種類頗多有日月桃一枝二花或紅或白二色桃粉紅千瓣鴛鴦桃千葉深紅壽星桃樹矮而花可玩

人面桃 聞雁齋筆談人面桃瑩白如雪光浮白外素者固艷不艷于此

手植緋桃 明張九一集陽和制府廨中緋桃甚盛乃毅皇帝手植為賦詩曰制府東開一畝宮曾傳翠輦

御微風緋桃手自先皇植花譜名將上苑同

煖暈 王衡集夫桃也遠而睇之光浮浮然近而即之
若有煖暈焉擬之于春殆異女乎

十月花 劉基詩今年南國天氣煖十月赤城桃有花
映月如霞 王叔承集夜次昆陵桃花園桃花數十畝
映月如朝霞忽忽身在華陽夢中也

桃花塢 袁衷集唐子畏築室桃花塢中讀書灌園

天賜桃 嘉靖注畧上夜坐庭中御幄後忽獲一桃左